

Powšitkowne WOZJEWJENJA

njedźelu, 3. nowembra 2024

Hudźbny nyšpor w Baćonju

Na hudźbny nyšpor mjez druhim z twórbami serbskeju komponistow Jana Cyža a Ulricha Pogody su wěriwi do Baćońskeje cyrkwy Jězusoweje wutroby přeprošeni. Tón budže tutu njedźelu, 3. nowembra, w 14.00 hodž. Na piščelach hraje ze wsy pochadźacy organist Tomaš Žur a na saksofonje Gerold Gnausch. Mjeztym přednjese farar Gerat Warnar wšelake teksty a modlitwy.

Koncert wjacorych generacijow w jednym chórze

Zakónčacy koncert Budyskeje chóroweje akademije generacijow budže sobotu, 9. nowembra, w 17.00 hodž. w Budyskej Marije-Marćinej cyrkwi. Na njej wobdžěli so 57 spěwarjow 16 do 79 lět, mjez nimi tójšto Serbow. Na koncerće zaklinča mjez druhim twórby Jana Pawoła Nagela a Wolfganga Amadeusa Mozarta. Sopranistka je Romy Petrick, organist Johannes Kral. Cyłkowny nawod ma Friedemann Böhme. Zastup je darmotny. Wunošk zběrki je za syrotownju w ukrajskim Lwiwje postajena.

Modlenje při kopolaku

Na modlenje swjateho rózowca při kopolaku za Hanku Šěrcec a na wopominanje wšěch přescěhanych su wěriwi sobotu, 9. nowembra, do Hórkow přeprošeni. Započatk je w 17.00 hodž. při Elic statoku na Chróšćanskej 17. Mjeztym džesać lět kopolak na dónt Hanki Šěrcec dopomina.

Podpěru za projekty prawje požadać

Norman Reitner z Drježdžanskeho biskopskeho ordinariata poskićuje na próstwu Towarstwa Cyrila a Metoda z.t. (TCM) kurs, kak móžeš projekty derje planować a k tomu na wšelakore wašnje pjenjezy požadać. Dalekubłanje na polu sponsoringa a fundraisiga wotměje so sobotu, 9. nowembra, wot 9.00 do 16.00 hodž. na „Radlubinje“ w Ralbicach. Wobdželić smě so maksimalnje 30 wosobow. By-li zajim wjetši był, by so TCM wo dalše zarjadowanje prócowało. Jědž a napoje budu přihotowane. Zajimcy – nimo člonow TCM su tež dalši přeprošeni – měli so online přizjewić. Link na to je pod www.posol.de podaty.

Paslenje adwentneje pychi

Maćerje a nanojo z džěćimi, ale runje tak samostejacy su na paslenje adwentneje pychi do Rózanta na administraturu pódla cyrkwy přeprošeni. Paslenje přewjedu sobotu, 23. nowembra, wot 14.00 do 18.00 hodž. Hladajo na to, kelko materiala měło so wobstarać, prosy Gerat Róbl ze Smjerdžaceje, zo bychu so zajimcy telefonisce pod čisłom (01 72) 7 94 75 22 přizjewili. Štóž chce, je we 18.00 hodž. k modlenju před Najswjećišim w Róžeńčanskej swjatnicy přeprošeny.

TCM prosy na škot a rommé

Sekcija Swójba Towarstwa Cyrila a Metoda z.t. (TCM) přepróšuje wšitkich zajimcow na škotowy turněr, kotryž wuhotuje wona wutoru, 19. nowembra, na předwječoru pokutneho dnja, we 18.30 hodź. w Jasčanskej „Bjesadže“. Kulturny dom nańdžeš z Dobrošic přijěducy a křižowanišćo přeprěčiwiši runjewon na kromje wsy. Wuraznje su nimo muži tež žony přepróšene, wšojedne kotreje staroby. Za tych, kotřiž njemóža škot hrać, zarjaduja zdobom turněr z kartowej hru rommé. Myta ma TCM za dobyćerjow wobeju turněrow sprihotowane. Wobdželenje je za wšitkich darmotne. Wo zastaranje z jědźu a napojemi so TCM postara.

Pomocna akcija „Łužica pomha“

Towarstwo Cyrila a Metoda z.t. (TCM) chce tež lětsa ze swojej nazymskej akciju „Łužica pomha“ diecezanskemu zwjazkej Charity w pólskim Ełku zaso pomhać. Tam wjesela so nade wšěm, štož w swójbe trjebaš, kaž su to drasta, črije, artikle hygieny a kosmetika za žony a dźěći, ale tež płokanski próšk, kuchinske graty abo pampersy za dźěći runje tak kaž za dorosćenych. Wotedać hodža so dary – po móžnosći w měchach – scěhowace dny pola Špitankec w Zejicach, Kamjenska dróha 10: po pjatkowaj, 8. a 15. nowembra, stajnje wot 15.00 do 18.00 hodź. kaž tež sobotu, 9. nowembra, wot 9.00 do 12.00 hodź. a sobotu, 16. nowembra, wot 9.00 do 11.00 hodź. Štóž chce akciju z pjenježnym darom podpěrać, njech přepokaza swój dar na konto Towarstwa Cyrila a Metoda z.t. (TCM): Cyrill-Methodius-Verein e.V., IBAN DE65 7509 0300 0008 2823 66, hesło: „Caritas“. Za dary hač do 300 eurow dosaha za financny zarjad mjeztym jako dopokaz kontowy wučah. Za wyše sumy wustaji TCM darowansku kwitowanku, trjeba pak dospołnu adresu, kotruž měli pak z mailku na TCM@Posol.de abo telefonisce pod (0 35 91) 55 02 10 zdželić.

Pytaja přidatnu hladansku wosobu

Hornjołužiski zwjazk Charity pyta k najblišemu móžnemu terminej za swoju Dnjowu hladarnju „Při Krabatowym puću“ we Worklecach přidatnu wosobu za hladanje a wobstaranje. Požadanja přijimuje nawodnica dnjoweje hladarnje Jěwa-Marja Šnajderowa pod adresu Při zelenišćach 5, 01920 Worklec, abo z mejlku na e.schneider@caritasoberlausitz.de. Nadrobne wupisanje je pod www.posol.de wozjewjene.